

# sambanwá

GIYA SA PAGSAMBA KAN BANWAAN NIN DIÓS

IKA-XXVIII DOMINGO KAN ORDINARIONG PANAHON  
15 OCTUBRE 2023 • TAON A • VERDE

## RITO SA PAGPOÓN

### Patarátará

**C** — An tema kan celebracion nin Eucaristia ngonian na Domingo iyo an pag-alok nin Kagurangnan sa bangkete nin pagkasararô, sa Eucaristia na kun saen an nagtutubod nagcelebrar kan balaog nin kaligtasan na iwinaras nin Dios huli kan pagsakit, pagkagadan asin pagkabuhay-liwat ni Jesu Cristo. Igwa kan dai minasimbag sa pangapodan na akoon si Cristo sa Eucaristia. Igwa kan dai minaakò sa presencia nin Diós, sa Kahadean na itinatao para sa kaligtasan kan kalag. Ipamibi niato na lugod padagos niatong akoon an pag-alok kan Kagurangnan na akoon siya nin may maninigong puso orog na sa Eucaristia.

### Antifona sa Paglaog

(S 129, 3-4) (Tindog)  
(Sinasantib kun mayo nin Awit sa Paglaog)

**Kun ika, Kagurangnan, magtanda kan mga kasombikalan, Kagurangnan, siisay an matagal? Ta saimo yaon an kapatawadan, O Diós nin Israel.**

### Pagpangurus asin Pagtaong-galang

**P** — Sa ngaran kan Amâ, asin kan Aki, asin kan Espiritu Santo.

**B** — Amen.

**P** — An Kagurangnan mapa-saindo.

**B** — Asin sa saimong espiritu.

### Gawe nin Pagsolsol

**P** — Mga tugang, akoon ta an satong mga kasalan, tanganing magkanigo kitang magcelebrar kan mga banal na misterio.

**P** — Ika na sinugo sa pagpaomay kan mga nagsosolsol: Kagurangnan, maherak ka.

**B** — Kagurangnan, maherak ka.

**P** — Ika na nagdigdi sa pagapod kan mga parakasala: Cristo, maherak ka.

**B** — Cristo, maherak ka.

**P** — Ika na nagtutukaw sa tóo kan Amâ sa pagsurog samo: Kagurangnan, maherak ka.

**B** — Kagurangnan, maherak ka.

**P** — Maherak man lugod sato an Diós na makakamhan asin,

pakapatawada an satong mga kasalan, darahon kita sa buhay na daing kasagkoran.

**B** — Amen.

### Kamurawayan

**Gabos** — Kamurawayan sa Diós sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangnan na Diós, Hadeng langitnon, Diós Amang makakamhan. Kagurangnan Aking Bogtong, Jesu Cristo, Kagurangnan na Diós, Cordero kan Diós, Aki kan Amâ, ika na nagpaparà kan mga kasalan kan kinâban, kaheraki kami; ika na nagpaparà kan mga kasalan kan kinâban, akoa an samong pakimaherak; ika na nagtutukaw sa too kan Amâ, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Diós Amâ. Amen.

### Colecta

**P** — Mamibi kita.

Kagurangnan, namimibi kami, danay na an saimong gracia mangenotan asin magsunod samo, asin padagos kaming gibohon na maorop sa mga gibong-marahay. Huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Diós, sa gabos na kapanahonan kan mga panahon.

**B** — Amen.

## LITURGIA KAN TATARAMON

### Enot na Babasahon

(Isaiás 25, 6-10a) (Tukaw)

*Nagpahayag si Profeta Isaiás manonongod kan panahon nin kaogmahan, an panahon kan pagdatong nin Kagurangnan, an Paratubos.*

### Pagbasa sa Libro ni Profeta Isaiás

Sa bukid na ini, an KAGURANGNAN nin mga hukbô

mahandâ para sa gabos na banwaan nin bangkete nin mga tabâ, bangkete nin mga manâgom na arak, mga tabâ na sinamnohan nin hutok, mga manâgom na arak na sinarâ. Hahalonon niya sa bukid na ini an tahob na nagtatahob kan gabos na banwaan, asin an hablon na hinabol sa ibabaw kan mga nación. Hahalonon an kagadanan sagkod pa man; papahidon kan KAGURANGNAN diós an luha sa gabos na lalawgon; an pagtuyâ-tuyâ sa saiyang banwaan hahaleon sa bilog na dagâ, ta an KAGURANGNAN nagtaram. Isasabi sa aldaw na iyan: “Uya, ini an satong Diós, naglaom kita saiya na ililigtas niya kita; ini an KAGURANGNAN, naglaom kita saiya; maggaya-gaya kita asin mag-ogma sa saiyang pagliligtas. Ta nagpamugtak an kamot kan KAGURANGNAN sa bukid na ini.”

Tataramon kan Kagurangnan.

**Gabos** — Salamat sa Dios.

### Salmo Responsorial

(Salmo 23, 1-3. 3-4. 5. 6)

**S** — Mag-eerok ako sa harong kan Kagurangnan, sa kahalabaan nin mga aldaw.

1. An KAGURANGNAN sakong pastor, dai ako magkukulang; sa madoot na kapatagan pinapalukó niya ako. Pasiring sa matiwasay na katubigan dinadara, an sakong kalag pinapaghinawa. (S)
2. Inaantabayan niya ako sa mga girá nin kasuripotan alang-alang sa saiyang ngaran. Maglakaw man ako sa kabâban kan anino nin kagadanan, dai ako matatakot sa maraot, huli ta ika kaiba ko. An saimong badas asin sugkod yaon, rinaranga ako. (S)
3. Inandam mo sa atubang ko an lamesa, laban sa sakong mga kalaban; linalahidan mo nin pahamot an sakong payo, an sakong kopa nagsusúpay. (S)
4. Karahayan sana asin kaboótan an maglalamag sako gabos na aldaw nin sakong pagkabuhay; mag-eerok ako sa harong kan KAGURANGNAN sa kahalawigan nin mga aldaw. (S)

## Ikaduwang Babasahon

(Filipos 4, 12-14. 19-20)

*Pinapasalamatan ni San Pablo an mga nagtarabang saiya kan yaon pa siya sa bilanggoan. An Diós nagtao saiya nin kusog sa panahon nin kadificilan.*

### Pagbasa sa Surat ni San Pablo sa mga taga-Filipos

Mga tugang: Tatao akong magpakumbabâ, tatao man akong magsagana; sa gabos asin sa anoman na kamugtakan nanòdan ko an tamang paagi kun pâno mabasog asin magutom, magsagana asin matikapó. Gabos kâya ko huli sa saiya na nagpapakusog sako. Alagad marahay an ginibo nindo sa pakidamay sa sakong kahorasaan. An sakong Diós iyo an mápanô kan saindong mga pangangaipo susog sa saiyang kayamanan sa kamurawayan ki Cristo Jesus. Sa Diós asin Amâ niato an kamurawayan sagkod sa panahon na daing kasagkoran. Amen.

Tataramon kan Kagurangnan.

**Gabos — Salamat sa Dios.**

### Pagrokyaw

(Efeso 1, 17-18) (Tindog)

(Sinambit kun dai inaawit an Alleluia)

**Allelúia, allelúia! Liwanagan kan Amâ kan satong Kagurangnan Jesu Cristo an mga mata kan satong puso, tanganing maaraman niato an paglaom kan pangapodan sato. Allelúia, allelúia!**

### Evangelio

(Mateo 22, 1-14 o 22, 1-10)

**P** — An Kagurangnan mapa-saindo.

**B** — Asin sa saimong espiritu.

**P** — ✠ Pagbasa kan banal na Evangelio susog ki **San Mateo**.

**B** — Kamurawayan saimo, Kagurangnan.

Nagpadagos giraray si Jesus pagtaram sainda (sa mga poón na padi asin mga pamayo kan banwaan) sa mga parábola: “Ikakaarog an kahadean kan langit sa sarong hade, na naghanda nin kasal para sa aking niyang lalaki. Sinugo niya an saiyang mga sorogoon na apodon an mga inalok sa kasal, alagad an mga ini dai nágustong magduman. Giraray nagsugó siya nin iba pang sorogoon, na an sabi: ‘Sabihan nindó si mga inalok: Uya, an sakong bangkete inamdám ko na, an sakong mga toro asin pinatabang baka binunô ko na, an gabos andam na, madya sa kasal.’ Alagad sinda, mayo nin pakilabot, naghale, an sarô para sa sadiri niyang umá, an sarô man para sa saiya man na negosio. Pinugol kaniba an mga sorogoon, dinahasan asin

ginadan. An hade naanggot, sinugò an saiyang hukbô, pinuhó an mga paragadan, asin an ciudad ninda sinubsoban. Dangan an sabi niya sa saiyang mga sorogoon: ‘An kasal andam, alagad an mga inalok bakong maninigo. Kaya lakaw sa mga pagsangahan kan mga dalan, asin an gabos nindong masumpungan, alokon nindo sa kasal.’ Nagluwas an mga sorogoon sa mga dalan, tinipon an gabos nindang nasumpungan, marahay saka maraot, asin napanô an sala nin mga inalok. (Alagad, paglaog kan hade sa pagkalag-kalag sa mga inalok, nakahiling siyang tawo na dai nakasulot nin gubing na pangkasal. An sabi saiya: ‘Katood, pâno ka nakalaog digdi na mayong gubing na pangkasal?’ Dai siya nakagirong. Dangan nagsabi an hade sa mga sorogoon: ‘Gaposa siya bitis saka kamot, asin tapokan sa kadikloman sa luwas: duman, an pagtangis asin an pagragot kan mga ngipon. Dakul an inapod, alagad dikit an napili.’)

**P** — Marahay na Bareta kan Kagurangnan.

**B** — Pag-omaw saimo Cristo.

### Homilia (Tukaw)

### Pagrokyaw

kan Pagtubod (Tindog)

Credo Niceno-Constantinopolitano

**Gabos — Nagtutubod ako sa sarong Diós Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Diós, asin namundag gikan sa Amâ bago kan gabos na panahon. Diós na gikan sa Diós, ilaw na gikan sa ilaw, totoong Diós na gikan sa totoong Diós, ipinangaki, dai linalang, sarô sa pagka-Diós sa Amâ: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.**

(Sa mga minasunod na tataramon, abot sa asin nani-tawo, an gabos minaduko.)

**Asin nani-laman huli kan Espiritu Santo ki Virgen María, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa tóo kan Amâ. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin**

**buhay: na gikan sa Ama asin sa Aki. Siya kaiba kan Amâ asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.**

### Pamibi nin Banwaan

**P** — Sa pagtubod, mag-arang kita sa Amâ na nagmamawot na an gabos na tawo mag-akò kan saiyang pag-alok sa bangkete nin buhay na daing kasagkoran sa langit

**S** — Kagurangnan, hinanyoga an samong pamibi.

1. Tanganing an Simbahan sa bilog na kinâban mamidbidan bilang tanda nin paglaom asin pampakusog-boot nin gabos na naglalakbay pasiring sa kamurawayan, ipamibi niato sa Kagurangnan. (S)
2. Tanganing masabotan niato na an pagigin miembro kan Simbahan bakong garantiya nin kaligtasan kun dai kita magbâgong buhay asin mabuhay susog sa katukdoan ni Cristo, ipamibi niato sa Kagurangnan. (S)
3. Tanganing magsimbag kita sa pagkamoot kan Diós asin padagos na magsulot kan gubing nin pagsolsol asin gibong-karahayan na itinao sato sa Bonyag, ipamibi niato sa Kagurangnan. (S)
4. Tanganing an mga naghehelang asin mga biyadi makamate kan pagmakulog ni Cristo huli kan satuyang mga gibong-karahayan, ipamibi niato sa Kagurangnan. (S)
5. Tanganing an gabos na mga gadan bendicionan kan Diós asin biyayaan nin buhay na daing kasagoran, ipamibi niato sa Kagurangnan. (S)

**P** — Langitnon na Amâ, giboha kaming danay na magdayupot saimo tanganing dai mi pagsayangon an mga biyaya na winawaras mo samo aroaldaw, dangan makisumaro kami sa saimong buhay. Huli ki Cristo samong Kagurangnan.

**B** — Amen.

## LITURGIA KAN EUCARISTIA

Pagdolot (Tukaw)

(Sinambit kun mayong Awit sa Pagdolot)

**P** — Inoomaw ka, Kagurangnan, Diós nin gabos na

linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

**B — Pag-omawon an Diós sagkod pa man.**

**P —** Inoomaw ka, Kagurangnan, Diós nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

**B — Pag-omawon an Diós sagkod pa man.**

**P —** (*Tindog*) Magpamibi kamo, mga tugang: tanganing an sako asin an saindong atang maako man lugod kan Diós Amang makakamhan.

**B — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.**

## Pamibi sa mga Dolot

**P —** Kagurangnan, akua an mga pamibi kan mga paratubod na may mga dolot na sacrificio, tanganing, huli kaining mga gibo nin maimbod na pagpamibi, makaabot kami sa langitnon na kamurawayan. Huli ki Cristo samong Kagurangnan.

**B — Amen.**

## Prefacio VII sa mga Domingo kan Taon

An kaligtasan huli sa pagkuyog ni Cristo

**P —** An Kagurangnan mapa-saindo.

**B — Asin sa saimong Espiritu.**

**P —** Lítaas an mga puso.

**B — Initaas mi na sa Kagurangnan.**

**P —** Magpasalamat kita sa Kagurangnan, satuyang Diós.

**B — Maninigo asin Dapat.**

Totoog maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Amâ, Diós na makakamhan na daing kasagoran:

Ta sa siring na pagkaherak namotan mo an kinâban: sinugo mo samo an Paratubos man sana; binoót mong makisumarô siya sa samong kamugtakan, maliban sa kasâlan, tanganing mamotan mo samo an namotan mo sa Akî; sa pagkuyog niya binâgo kami para sa saimong mga

balaog na napatimasang mi sa pagkasalâ nin dai pagkuyog.

Kaya kami man, Kagurangnan, kaiba kan gabos na Angeles asin Santos nagpapahayag nin pagtubod saimo, maogmang nagsasabi:

**Gabos — Banal, Banal, Banal an Kagurangnan Diós ni mga hukbô. An langit asin dagâ pano kan Saimong kamurawayan. Hosâna sa kaitaasan. Paladan an minadigdi sa ngaran kan Kagurangnan. Hosâna sa kaitaasan.**

## Pamibi sa Eucaristia (*Luhod*)

**P —** Misterio kan Pagtubod.

**B — An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

**P —** Huli saiya, asin kaiba niya...

**B — Amen.**

## RITO SA PAGCOMUNION

### Ama Niamo (*Tindog*)

**P —** Natukdoan kan...

**Gabos — Ama niamo, na yaon sa langit: pabalanon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.**

**P —** Agawa kami sa gabos...

**B — Huli ta saimo an kahadean, asin an kapangyarihan, siring man an kamurawayan sa mga kapanahonan.**

**P —** Jesu Cristong Kagurangnan...

**B — Amen.**

### Pagpahayag kan Katoninongan

**P —** An katoninongan kan Kagurangnan danay na mapa-saindo.

**B — Asin sa saimong espiritu.**

**P —** Magpatinaraohan kamo nin katoninongan.

## Cordero

**B — Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: kaheraki kami. Cordero kan Diós, na nagpapara kan mga kasâlan kan kinâban: tawi kami nin katoninongan.**

## Pag-alok sa Pagcomunión (*Luhod*)

**P —** Uya an Cordero kan Dios...

**Gabos — Kagurangnan bako akong maninigo na ika magdagos sa sakuyang harong; alagad magtaram ka sana, asin an sakong kalag maomayan.**

## Antifona sa Comunion

(*Cf. S 33, 11*) (*Tindog*)

(*Sinasambit kun mayong Awit sa Comunion*)

An mga mayaman nangaípo asin nagutom; alagad an mga naghahanap sa Kagurangnan dai magkukulang sa gabos na karahayan.

## Pamibi Pakacomunion

**P —** Mamibi kita.

Kagurangnan, mapakumbabâ kaming nag-aarang sa saimong kadakulaan, tanganing, siring na pinapabasog mo kami kan orog kabanal na Hawak asin Dugo, giboha man kaming makihiras sa buhay na diósnon. Huli ki Cristo samong Kagurangnan.

**B — Amen.**

## RITO SA PAGTAPOS

### Solemneng Bendicion

**P —** An Kagurangnan mapa-saindo.


**B — Asin sa saimong espiritu.**

**P —** bendicionan man lugod kamo kan Diós na makakamhan: an Amâ, asin an Akî, ✠ asin an Espiritu Santo.

**B — Amen.**

**P —** Lakaw kamo sa katoninongan ni Cristo.

**B — Salamat sa Diós.**



**sambanwá**  
GIYA SA PAGSAMBA KAN BANWAAN NIN DIÓS



**MOST REV. ROLANDO J. TRIA TIRONA, OCD, DD,** Arzobispo kan Caceres  
**REV. FR. LUISITO A. OCCIANO,** Direktor, Caceres Commission on Communications  
**REV. FR. GLENN C. RUIZ,** Direktor, Commission on Liturgy  
**REV. FR. ERIC P. BOBIS,** In-Charge, Social Media  
**JOHN PAUL M. AVEN** asin **JUAN CARLOS R. MADRID,** Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2023